



**Migrant tem Ceuta
toktsür odar: Spain**

**Preeti, Jaismine nati gold, Praveen-i silver
aser Prabhu-i bronze medal nguogo**

VOL. XXIII ISSUE NO. 290 (ADOK 290) DIMAPUR AMUNGNÜ (SUNDAY) LUROI (AUGUST) 02, 2026

₹ 5.00

Longsa nung Tsüngremmung amung Ao Senden-i Tsüngremmung ayongzüka aka

Dimapur, August 1, 2026 (TYO): Longsa Village Council-i Salang Lenden, Longsa nung Tsüngremmung Festival 2026 ayongzüka mungogo.

Department of Tourism, Government of Nagaland-i teyari agüja iba benjung amung aser Chief Host ji Rural Development & SIRD Minister Metsübo Jamir liasü.

"Benjung amungba chichibaji Tsüngrem nungi temoatsü meshiba, yimjung yangluba aser nübortem tsüngda telongjem akangshiba lir. Benjungmunger ajaki item tangatetba alitsü ayongzüker" ta Youth Resources & Sports Advisor & MLA S. Keoshu Yimkhiong-i o jembidang ashi.

"Mapang ka Naga nunger kin balala süaka longjema liasü, Khristan yimsü marudang, shisaliok metenzükdang aser sorkar inyakyim malidang asenok longjema liasü. Iba telongjem ajanga 1963 nung Nagaland-i state jenjang angu saka telok balala aser telungpurtem tsüngda telemsa adokba ajanga asenok tashimait kümogo. Anungji asenoki telongjem aser yimjung asoshi inyakttsüla aser iba nung kija shia indang tebilemtsü khuret lir" ta pai ashi.

Longsa ya temoatsü aliba yimtsüng ka lir aser iba yimtsüng nungi khen danga methitemi MLA o Minister tem adokyonga arur. Longsa Village Council lenisüba atema tenüngsang agütsür aser Mokokchung ajanga kin aika, talisa eastern region nung alirtem anitetba aser yariba atema pelar ta Keoshu-isa ashi.

Land Resources Advisor & MLA G. Ikuto Zhimomi-ia Tsüngremmung salem lemsatepdang lisopur benjungtem ya Naga maitsü nung tongtipang shilem ka lir aser benjungbentsü ya aluyimba nung tera yanga lir aser putu balala melenzüka arur ta ashi.

"Benjungtem ajanga traditional arts, crafts, music aser dance ajungketer aser lanuputu dang asen senmang wazüka ayutsü ajungmesor. Nagaland nung tourism tejakleni aoer aser iba mapang Aor sobaliba subotsü, osetttem aser inyaksangshi ajanga Nagaland tourism economy nung teyari agütsütsü lenmang sadema lir" ta paisa ashi.

Iba sentong nungsa Chief Host Metsübo Jamir aser Water Resources Advisor & MLA Tongpang Ozukum natia Tsüngremmung salem lemsatepa liasü.



Mokokchung nung Ao Senden-i ayongzüka Tsüngrem sentong akadang Sentong Akhumdong Hon'ble MP Lok Sabha Wb.S.Supongmeren Jamir-i Arr atsütepertem ajurua salem asüba noksa nungji angur

Mokokechung, Luroi/August 01(TYO): Otsüla Oboula nunger mapang nung par taküm asüngteta ali aser Tsüngremmung amung yongji par mapang tsüksüngonsüng liasü. Tsüngremmung amungdang asen Aori 1872 küm E.W.Clark ajanga Tsüngremi Temoatsü yokba ama tanga Tsüngrem dang temoatsü yokangtaTsüngrem dang akangsü kanga dang nungtaker. Asenok Aori lanur tajung, lenir tajung, political lenir tajung aser linük tenzüker tajung adokdakjang ta asür saka asenoki Tsüngremmung amungba mapang nung shi azüh jangaraba nung dang mungra Tsüngremmung amungbaji

amajok dang asütsüta tanü Imkongmeren Sports Complex nung Ao Senden-i ayongba Tsüngremmung sentong nung Sentong Akhumdong Hon'ble MP Lok Sabha Wb.S.Supongmeren Jamir-i jembidang ashi.

Paisa Tsüngremsang aser Merangsang tena tsüngda nung kecha miimtepa malisa Tsüngremsangi pa temoatsü anguba indang indanga Merangsang den lemsatep. Tanüa asenok Aori kati ka tuluba ta mesüi asenok longjemer asenoki alima ajungketba nung shilem magiteta asenok tangar matsüngdang nüma metangtetsüta ashi.

ABAM-i anir Clean Election

sangdong aser ibaji nüburtemi, Arogoi, aser yimdeni kanga dang ret reta agizük aser ki ajak nung wako temesüng asong saka iba temesüngto temelungjang agi magizüktet. Clean Election-ji ka anema masü saka clean election-ji akhi tsürabur mapang ochishia merük merüka yimsüsür shimtetba ama Ao kini lenirtemji shimtettsüla, asen lima nung VDB Secretary ka shimtettsü asoshia rongsen jenti indoker, yimsüsür shimba nunga ken o tulu adoker süra iba jagi Ao lima lenisüba aser yimsüsüba jungdima aser Land of Pioneer ta asübaji tetemsü asüta temelung shirangba olen ka lemsatep.

(Maneni tapak 2 nung...)

Dimapur nung lanurtemi ayongzüka Tsüngremmung amung



Dimapur Ao Lanur Telungjemi ayongzüka Tsüngremmung benjong sentong teloki shilem agia Tsüngremmung ken atenba noksa nung angur. (IMC Hall, Dimapur, August 01, 2026)

Dimapur, August 01 (TYO) : Aotsür Aortem tesem balala nung Tsüngremmung benjong amung tenzüka anogo nung, Dimapur nunga tanü August mezüngnü Dimapur Ao Lanur Telungjemi ayongzüka IMC nung Tsüngremmung benjong sentong tajung ka ayongzüka mungogo.

Iba sentong nung Alakteta jaoker, MLA & Advisor, Transport & Technical Education, Nagaland Wb. Temjne menbai lanurtem den benjong

tepela lemsatepa jembidang, "Dimapur nung lanurtemi nübortem asoshi mapa tajung jenti inyakba ngua tepela agi ni iba sentong nung adentsü pelashishia agizükogo," ta metetdaksü.

"Tang ya asenoki asenok ya akhi mapang ama masü saka mapa ajak nung atsüngzüker amai jembir, ajisüaka tang mapangba ya asenok alur masü saka tangar atur, anungji asenok asoshi ibai aluba mapang masü

saka terenemshiba mapang tajung ka lir," ta Wb. Temjenmenbaisa metetdaksü.

"Asenok tarutsü kanga junga angur, anungji tang terenemshiba mapang nung ya, asenoksasa asenok tashimait bushia metongshitsüla aser tangar kintem den asenoka akhi nungi külemi sobalibaa aruba lipok otsü tajungtem bushia akangjungshitep tenzüksüla" ta paisa ajungshi.

Paisa lanurtem dang mapa

inyaka rongsenren nung renloksü asoshi asen lima nung tzümartemi inyakba mapatem ajak ya asenokia inyaktetsüla ta tayongzüka ka agütsü.

Iba sentong nung tajungshi o ka lemsatepdang, "asenok yabo tashiyim inyaka alitsüba masü saka tangari asen mapa aser jakla junger ta ashitsüsa asenoki litettsüla, iba jagi dang asen yimli tajungba aser tuluba küma yanglutettsü" ta taoba DALT shisalen sayur Wb. I. Anungba Sangliri metetdaksü. Paisa lanurtem dang Ao oshi tajungba renloka odaktsütsüsa maneni shilem tajung agitsü ajungshia liasü.

Kasa sentong nung tayongzüka o ka jembidang, Ao Senso Telungjem Dimapur nung tir Wb. Ningsangwaba-i "Dimapur nung Ao Lanur Telungjem aliba agi Aotsür Aor aliba shisangdaksür aser Aotsür Aortem kümzüka yuteter, anungji ano maneni lokti aser yimten temaba aser tuluba menden nunga Ao lanurtemi shilem agitsü renemdaksür," ta metetdaksü.

Paisa lanurtem dang, tangari asenok dak temulung lemtettsüsa

sentong tajung ayongzüka Naga kintem den külemi inyakttsüba sentongtem apiteta inyakttsü ajungshi.

Iba sentong nung Tsüngremmung ratet DALT Advisor, Wb. Imtiaküm-i ashi aser lanurtem atema Dimapur Watsü Telungjem nung Advisor Dr. Tainla Mari sarasademtsü. Iba sentong nungsa DALT nung taoba Tatong tir Wb. Imkongsüngkümi anir teloki Tsüngremmung ken aten.

Iba sentong tetenzüklen telok pelaa agizüka DALT tir Wb. Boktiba Jamiri ashi aser DAYO Sanen Luden nung taoba züngsem Wb. Limatangit Lemturi DAYO-i inyaka aruba mapatem lemsatep aser tatembang nung, DALT Sanen Luden Tayonger, Wb. Imsentemjeni melepzüng o ashi aser telok ajak külemi sarasademer benjong chiyongba mapang liasü.

Iba benjongmung sentong lenir Wb. Süngküm Aier liasü. Iba benjong chiyongba yimpoksür, lanur lenirtem Wb. Lanuchuba Imchen aser Ayimkümba na liasü.

MLA Nuklotoshi-i anentsü ajanga Arkakong kübok timtimer kibong tem nem teyarir agütsü



Longchara ward

Mokokchung, Luroi/August 1 (TYO): July nü MLA Nuklotoshi-i Mokokchung kübok Arkakong nung tzünglu sashia arua anentsü ajanga ki raksaja timtimer kibongtem tsüngdong oa semdanga teyari agüja yaritep.

Iba anentsü agi kongshir timtimer kibongtem ajak agi 16 liasü aser teyari agizükertem rongnung Longchara ward, Changtongya town nung kibong

10, Unger yimtsung nung kibong 2 aser Akhoya nung kibong 4 densema liasü.

Iba den MLA-isa leman aser tesem balala repranga senzua tekuritiba nung leman raksaba aser timtim agi kongshir alirtem repranga teyari tem agütsütsüba indang paisa lemsatepa liasü. Iba anogo MLA Nuklotoshi den Changtongya administration, 22/AC Constituency nungi party

lenir tem aser yimden yimsüsür tem den ajurutepa mensem balala mena tang rongdak nüngdak tem lemsatepa liasü. Iba mensem nung Moakumzüc 22/AC constituency President, Unger Council Chairman, Akhoya council chairman parnoki MLA Nuklotoshi tang pa mapa tajung aser nübur aria bilema timtimer kibongtem arua semdanga yariba asoshi pelaba Lemsatepa liasü.

Dimapur Police-i temesepba mozü shibelener pongu puogo

Dimapur, Luroi/August 1 (TYO): Temesepba mozü shibelenba anema jenjang tongtibang ka agia Dimapur Police-i Dimapur nung amendaker inyaksangshia aliba cocaine shibelener ka puogo, aser iba ajanga state asem aser Nigeria nunger ka densema temesepba mozü shibelenba telok ka kaktetogo.

Bushisüngdang ajanga iba telok yagi DTDC Courier Service densema commercial courier aser parcel delivery channel tem amshia cocaine belener arur lemshiba ngutetogo. Iba inyakyim nung temesepba mozü supply asür, agizüka achaayanger aser delivery agent tem kanga junga sendaktepa inyakba ngutetogo.

Narcotic Drugs and Psychotropic Substances (NDPS) Act, 1985 kübok provision balala dak ajemdaker West Police Station, Dimapur nung ken o ka benokogo. Bushisüngdangba mapang police-i cocaine gram 33

ngutetogo, koba forensic examination atema yokogo.

Ken o dak sendakba nung nisung pongu puogo. Police-i pua alirtem ya asür Z. VikhesheAssumi'er jabaso Tohuka Sema (35) (Dimapur nung amendaker aliba supplier), Ahokhe Awomi'er jabaso Yeka Awomi (30) (Pune, Maharashtra nung apu), asür Dhirender Singh'er jabaso Biresh Kumar (22) (Delhi nung apu), Ismail Ansari'er jabaso Akhtar Hussain (35) (Delhi nung apu), aser Baga'er jabaso Swantheiba Inkah (25) (delivery agent) nunger densema lir.

Aija alir rongnung anabo Nagaland tema nung alir aser tang tashi monguteti lir. Tena ya aputsü atema maneni inyakdar.

Bushisüngdang ajanga iba telok ya kanga junga sendaktepa inyakba ngutetogo. Temesepba mozü alizüktsü, senotsü tsütateptsü, state adena shibelentsü, courier ajanga bener arua commercial logistics channel tem ajanga

cocaine lemshitsü asoshi sentong kanga junga yanglur inyakyim bentet benteta inyakba ngutetogo.

Bushisüngdang ajangsa state balala aser linük tanga dena tesendaktep aliba ngutetogo, kong Nigeria nungera ka densema lir. Maneni ken o nung sendaka alir tangartem, senotsü tsütepba, customer aser iba telok indang onsang tejangja agitsü atema bushisüngdang südar.

Dimapur Police-i ashiba agi, temesepba mozü shibelenertem ajak pua NDPS Act, 1985 kübok provision tapet dak ajemdaker merenshitsü atema parnok bendanga agütsür lir.

Ken o dak sendakba nung nüburtem dang temesepba mozü shibelenba dak sendakba nung police den teka amteper inyaka osang kar danga ngutetra lemsateptsü metetdaksüogo. Osang agizükba ajak ya shinga nema memetetdaksütsü, ta kasa sangdong ajangasa metetdaksü.



Longsa yimtsüng nung August 1 nü Tsüngremung benjung ayongzüka amungba mapang yar tsüngsangba noksa nung angu

Naga Hoho-i asükhu lemsatep

Dimapur, Luroi/August 1 (TYO): Naga Mothers' Association, tir Vilanuo Angela Yhome, July 13 nü Kohima nung asüba osang angazüka mang ayimba Naga Hoho-i sangdong ka ajanga lemsatepogo.

VilanuoYhome ya Educationalist, tetsür temeden atema nokdaker ka, tekübokba jenjang nung lokti tenzüker ka aser local, regional aser national jenjang nung Arogo asoshi nükdang tajung ka liasü.

La tasütait aser tatishitsü aketba lenir ka, shibai Naga nunger yimjung aser ochi obendang asoshi bendanga agüja inyaka aruogo. La ya Naga nunger lanurtem atema

tetsü ka ama liasü, aser iba ya lai Naga Mothers' Association kübok mapa balala bena tenzüka agi dang masü saka pa taküm libaliro aser lokti atema bendanga agüja inyakba agi sayur.

La asüba ajanga Naga nunger loktiliba aser yimden yimsüsüba wadang nung tawa tulu ka adokdaksüogo, koba süngdaksütsü tasak asütsü. Onoki lar kinungertem den asükhu lemsateper.

Mangyimertem den onok sarasadem dena lir aser la tanüla teti tatem makadak anisüngzükdakjang ta sarasademja atar, ta Speaker Pauheu Newme-i kasa sangdong ajanga metetdaksü.

Ao Senden-i Tsüngremung ... (TAPAK 1 NUNGI...)

Tsüngremi asenok nem nenok tekolak süang aser nenoki aniangta nongloksü saka asenoki asenok sasa iba temoatsüji indoker tanü asenok tebenlak nung sür kazüdag, ibaji kechi tai ta süra asenoki Tsüngremi mulungba nung mejaja sülaba, otsüla oboula nungeri ochishiba toktsüba intok sülaba, nükmerem ang shimtet sülaba, kati ka dang tajunga ta meshitetba agi sülaba, anungji asenoki tanü ama Tsüngremung mapang item tera tamajungji rakteta intoktsü aser Tsüngrem dang temoatsü meshiba mapang südi ta Supongmeren-isa adenshia aliba Aotsür Aor ayongzüka jembi.

Naga nunger asoshi inyakba nung Aori tamakok alua mali, Naga nunger Aor-sa tajungba ta asütsü, Saka Aori Tsüngremi mulungba nung mejajaba agi aser Aori ya Ao kin asoshi jenjangdong tamendakdak ka merenemtetba agi tanü Ao kin shiranger. Tangari Naga nunger atema Aorji kanga tajung ta asür saka Aor asoshi Aorji kanga majung, ya kechi tai lir? Aori iba taiji arok aroka bushidangtsü mapang tongja tongogo ta Supongmeren-isa lemsatep.

Naga lima nung MLA 60 shimtetba NagaA or MLA 11 lir aser MP ka lir süra 12 ji obang ka asütsü asoshi sabang ka akatsüla. MLA adokertem nemji tai tetongloksü, saka ibaji tsükong nungi, yim nung shimtet asünung yim meputep ibaji shisadangtsüla. Aor ajurutepdang item khuret ya lemsateptsüla aser election nung MLA shimtetba yimya ya melenshia Ao kini nübu tajung aser tetemsü shimtettsü mapatong tenzüksüla ta MP Supongmeren-isa ayimoktsü. Tsüngremi shimtetba Isreal nübur Egypt lima nungi aniteter kelen parnok tsünga

rongrong adok, meputep aser nükmerem aser nemnemshinem adok aser talisa lenir dak tenükmerem tenzüka agi par liner Kanan lima metongtet. iba wara jagi asnok matongdang asen Aor khien saksalemshidita paisa ayongzüc.

Nagaland nunger tangar lima dang develop asür ta asenok Aori jembi, saka asen Mokokchung-i aruba development mapaji kechi ajanga metemteter iba timtemji bushitettsüla. Asenok nem agütsüba senoki meinyaktet nung asenoki tangar nem tai metongloksütsüla ta Supomeran-isa Mokokchung development indang olen ka süoka jembidang ashi.

Ao kaketshir Mungdang Tir Sb.Lanulemba ketdangsüba nung iba sentong ani aser Wb.Sentiyanger Pastor Ngati Baptist Arogo Pastor-i sarasadema sentong tenzüc. Ao Senden Tir Wb.Marsanen Imsong ajanga tarur pela agizüka jembi aser Village Council Khensa Chairman Wb.I.Alemmeren Longchar ajanga Tsüngremung ratet lemsatep. Watsü Mungdang aser Ao lanur Telongjem ajanga ken balala aten aser ano Watemdong Cultural Club Ungma ajanga Yar Tsüngsang ka ayi iba den ano Mokokchung Deputy Commissioner Ajit Kumar Verma IAS aser Mokokchung Municipal Council C h a i r p e r s o n Wb.Imkongchuba A tenatia Tsüngremung salem lemsatepba den All Ward Union Mokokchung Arr Atsütepba tetoktepba Semi Final aser Final atsütep aser iba nung Alempang Ward-i Champion ngutet aser tatem nung Ao Senden Sanen Luden Züngsem Wb.K.Imtituba ajanga Tsüngrem nem tenüngsang agüja sarasadema sentong tembang.

Ethanol ya petrol dang nungi jenjang tasakba: Arvind Kejriwal



August 01, 2026 nü New Delhi nung 'National Town Hall Against E20' sentong nung Aam Aadmi Party (AAP) national convener, Arvind Kejriwal (ajichi) aser comedian Shyam Rangeela na tangokba noksa nung angur.

New Delhi, Luroi/August 01 (Agencies): Honibarnü Aam Aadmi Party (AAP) national convenor Arvind Kejriwal-i, petrol temeja alitsü mesüra ethanol meyoktepba petrol alitsüji sensotem melung südaksütsüla, ta ashi.

'National Town Hall Against E20' sentong nung jembidang pai, E20 petrol anema temepishiba agütsütsü atema August 3 nü pa leniba nung telok ka Ato kilonser Narendra Modi'er ki tonga aotsü, ta metetdaksü.

New Delhi nung aliba Constitution Club of India nung lokti den jembidang Kejriwal-i, "Iba onük nung sorkari

tangatetba melenshir. E20 totzü atema sorkari opposition party tem nem tai tongloksür," ta metetdaksü.

Kejriwal-i, "Ethanol meyoktepba ya ajanga jenjang atutsü aser alizükertem aser aluyimertem napronglai timtem ajurutsü. Ethanol ya petrol dang nungi jenjang tasakba, aluyimertem timtemer, kechiyong iba ya ajanga tzü aser ali menentsür. India-US shishilembaba tezüngzüktep ajanga sorkari sensotem madak E20 kangshia benoker," ta ashi.

E20 totzü benokba sülen yaküm küm den medemdangra India-i ethanol import asübaji ponguben agi teimba akümtsü,

ta pai ashi.

Taoba mapang Delhi chief minister-isa, Honibar nikongdang nungi tenzüka pai temepishibatem bendentsü aser nisung 100 anir Lok Kalyan Marg tashi aotsü, ta ashi

"Centre sorkari, tetendangba balala agiogo aser E20 ajanga gari nung timtem madokdaksür ta shiogo. Sorkari iba report ji lemsateptsü ni mepishir," ta pai metetdaksü.

Iba sentong nungji state balala nungi nisung aika arua aden aser sentong nung adenertemia E20 totzü atsükba ajanga gari nung timtem adokba lemsatepa liasü.

Lok Sabha senden nung Births & deaths bill agizükogo

New Delhi, Luroi/August 01 (Agencies): Lok Sabha senden nung Registration of Births and Deaths (Amendment) Bill, 2026 onük nung o lemtep mesüi iba bill agizükogo.

Senden nung opposition züngsemtemi paper leak, police-i kaketshirtem dak tashiyim amshiba aser Ayodhya nung Ram tekülem ki tenla auyaba ken otem nung ajemdaker sorkar anema yimiyim ayima rongrong tadokdak mapang nung iba bill agizük.

Anüngdang senden ghonda ka thinenba sülen tanaben asentenshir senden tenzükdang iba bill benok. Iba bill ya home minister Amit Shah-i benoktsü list süa liasü, ajisüaka senden nung pabo maliba atema

opposition-i aitsü.

Opposition züngsemtem aika sabangleni oa Lok Sabha senden nung Amit Shah alitsüla, ta takhangba agütsü.

Iba bill tasenba ya ajanga 1969 küm agizükba ozüng melentsü. Mapang shidak nung tanur asoba aser nisung asüba registration agitsü latetba bill ya voice vote ajanga agizük. Iba bill nung o melemtepi iba bill agizükba atema Congress lenir KC Venugopal aser opposition MP temi sorkar sashia aitsü.

Lok Sabha senden nung Congress züngsemtemi tawa longkak aiter kaketshirtem dak police-i tashiyim amshiba anema longkak ait aser Samajwadi Party nungi MP temi Ayodhya nung Ram tekülem ki tenla auyaba anema

ozülü amer longkak aita liasü.

Tesülen Parliamentary affairs minister Kiren Rijiju-i, iba bill atema o entepba nung opposition-i shilem magiba ya kanga tia maka, kechiyong business advisory committee senden nungbo parnoki iba bill atema o entepba nung shilem agitsü melunga liasü, ta ashi.

Rajya Sabha senden nunga opposition MP tem aikati o jembitsü atema opposition lenir, Mallikarjun Kharge nem temelaba agütsütsüla, ta takhangba agütsü saka chairperson C P Radhakrishnan-i magizük.

Opposition züngsemtemi maneni longkak aita yimiyim ayimba mapang nung Agriculture minister Shivraj Chouhan-i, "Opposition-i jenjang makaba politics asayar aser senden akhümket raksatsür," ta aitsü.



August 01, 2026 nü Vizianagaram district nung Alluri Sitarama Raju International Airport semzüksüba sentong nung Ato kilonser, Narendra Modi aser Andhra Pradesh Chief Minister, N Chandrababu Naidu na tangokba noksa nung angur.

Tir Droupadi Murmu-i anti-paper leak amendment Bill agizükogo

New Delhi, August 01 (Agencies): Anogo ishika tejaklen Parliament nung anti-paper leak bill agizükba sülen linük Tir, Droupadi Murmu-i sign süa iba bill agizükogo.

Ministry of law & justice-i, Tiri Public Examinations (Prevention of Unfair Means) Amendment Bill, 2026 agizükogo, ta metetdaksü.

Public Examinations (Prevention of Unfair Means) Amendment Bill, 2026 ya Brihostibarnü Rajya Sabha nung voice vote ajanga agizük aser Lok Sabha nung

Bodhbarnü agizüka liasü.

Parliament nung iba Bill agizükba sülen Ato kilonser Narendra Modi-i Instagram ajanga, "Paper leak anema ozüng tesashiba benoktsü atema inyakba tongtimbang mapa tembangogo," ta metetdakja liasü.

Iba ozüng tasenba kübok public exam balala nung paper leak asüba nung shilem agirtem mesüra ochimashi inyaktertem küm 5 nungi küm 10 tashi tepuokdak ayutsü aser senchi lakh 50 tashi achitsü.

Kerala nung anentsüh lendong balala nung nisung pezü asü



August 1, 2026 anepdang Poonjar Thekketkara panchayat kübok Payyanithottam nung anentsüh aluba tesem nung sepaitemi kümzüka maparen inyakba noksa nung angur.

New Delhi, August 01 (Agencies): 2018 küm Kerala nung anentsüh lendong tulu atalokba mapang nung nisung 483 süba sülen taküm-a Kerala nung tüzümsüng aser anentsüh lendong kanga bulua atalokdar.

Hokolbar aonung Central Kerala nung aliba district tem nung tzünglu kanga aruba ajanga Pathanamthitta, Idukki aser Kottayam nung tüzümsüng aser anentsüh lendong aika atalokogo aser item lendong nung nisung pezübo süogo.

India Meteorological Department (IMD)-i Pathanamthitta, Kottayam, Idukki, Malappuram, Kozhikode, Wayanad Kannur aser Kasaragod district tem nung red alert sangdonga lir.

Idukki district nung nisung ana anentsüh lendong nung asü. Arrshi küm 69 tantsür ka Honibarnep anentsüh agi ki anenbangba lendong nung asü.

Vagamon nunga arrshi küm 72 tambur ka par kinünger kidang amongba mapang nung anentsüh ajanga ki anenbangba lendong nung asü.

Ghonda 8 tashi tzünglu maneni aruba ajanga tesem kar nungbo tzünglu 30 cm dak tali aru. Idukki district kübok Vagamon nung tzünglu 31.4 aru, Pathanamthitta nung 33 cm aru aser Laha nung 25 cm aru.

Pampi ayong nung tzü tali metsüngba ajanga ayongküm tip anatsülen aliba ki aika tzü agi metsüngbangogo. Ranni jila nunga tzü agi ki aika metsüngbangogo aser gari mesenzüteti liasü.

NDRF, Fire & Rescue Force aser Police-i rong tila amshia

kümzüka maparen inyakba den külemi chiyungtsü lema agütsü aser aika relief camp-i anir oa jenokdaksüogo.

Kottayam district nunga tzünglu maneni aruba ajanga anentsüh lendong nung nisung ana asü aser kar samaogo. Arrshi küm 28 Josephine Johny aser tetsü, Rejina Johny naprong tasü mangji ngutetogo.

Ketdangsertemi iba tesem nungji maneni samaba nisungtem bushidar. Iba dak alia Koottickal, Teekoy aser Munnilav kübok tesem aika nung anentsüh lendong ataloka liasü.

District administration-i tüzümsüng agi kongshirtem jenokdaksütsü atema Kanjirappally, Changanassery aser Kottayam nung relief camps amenokogo.

Kerala Chief Minister V D Satheesan-i, state nung tzünglu maneni aruba dak sendakba lendong atema sorkar renema dang lir, ta metetdaksü.

Satheesan-isa, pai Revenue Minister, Chief Secretary aser district collectors den phone ajanga anentsüh aser tüzümsüng dak sendakba osang metetpelaogo, ta metetdaksü.

Satheesan-i, sorkari yirua alirtem tajungtiba nung yaritsü aser tüzümsüng agi kongshiba nüburtem nem teyari agütsütsü, ta metetdaksü.

Tzünglu maneni arutsü asadangteta aliba nung ajemdaker Pathanamthitta, Kottayam, Idukki, Malappuram, Kozhikode, Wayanad, Kannur aser Kasaragod district tem nung administration-i shisaliok rejutem shibangtsü atema tetuyuba agütsüogo.



TIR YIMYIM YIMOBILEM (EDITORIAL)

DIMAPUR SUNDAY, AUGUST (LUROI) 02, 2026

Temenenji özüng raksaba

Asenok taküm nung Tsüngrem tsütsü tangatetba aser tazüokba mali alitsübaji kanga lendong lir, kechiyong tangatetba agi dang asenoki tajung aser tamajung na bendangtetter. Aji oda, Tsüngrem o aser Pa özüng kübok asenok alitsübaji asenok atema temoatsü aser tajangzük lir. Alima nung yimteni latetba özüng aika lir aser item özüngtemji senso shia taküm, kibong aser rongsen kümzüka ayutsü atema latetbatem lir. Aji oda, alima özüng agi asenok taküm kümzüksü asoshi latetba ama Tsüngrem özüngjia asenok taküm aser tanüla kümzüksü atema latettsübatem lir. Asenoki Tsüngremi ashiba angaa jajartembo alena ayu ama bilema alitsüa akok, saka Tsüngrem özüngi asenok malener saka asenok kümzüker. Tsüngremi asenok ajungtsü aser ajangzüksü atema tajung aser tamajung meteta inyaksü asoshi özüng aika lateta yuja lir, saka itemji beshitsübajibo asenok mulung. Alima özüng nunga gari anitsüba özüng lateta yuja lir, saka asenoki iba özüngji mangai mashimashi anira tasüba lendong ajurutsü ana nung lir. Iba ji mesüka Tsüngrem özüng raksaba nunga lendong lir. Ibayongji, 1 John 3:4 nung ashir, "shibaisa temenen menar, pai özüng raksar, kechiyong temenenji özüng raksaba lir." Tsüngrem özüngji asenok atema teti alitsü. Alima sobaliba melenshitsuä akok mesüra tensa melentsüa akok, saka Tsüngremer özüngbo memelenshir, kechiyong Tsüngremer özüngji ochi aser ochiji kodanga melenshitsuä makok. Aji oda, alima tashitemetet nung aiendang, sobaliba melenshidang, asenoki aiben Tsüngrem özüng beshiba agi mesüra Lashiba nung shia aliba ama asen taküm libaliroba agi asenoksasa asenok alena ayua ama bilema alitsüa akok, mesüra asenokang takoksa angur ama bilema alitsüa akok, saka Tsüngrem o Rom tapu 6 tekong 23 nung ashir, "Kibuba Yisu Khrista ajanga asenok nem agütsüba sempetji TETI TAKUM lir." Alima özüng beshir senso tajung kaji alima nung jangratema alitsüa akok, saka pa teti taküm malitsü, kechiyong paji asütsü. Ajisüaka, shirnoki Tsüngrem özüng nung jajar parnokjibo kodanga masütsü. Iba jagi asenok tanüla aser tamang nung tasü itdaksür. Tsüngrem özüng angaba agi teti taküm dang masü saka teti pelaa alir. Tatishitsü ka, Tsüngrem özüngi asenok dang nüktapangta mebenshitsuä ashir, kechiyong Pai asenok kibong meraksai teti jangratema pelatepa lidaktsüner. Aji oda, Tsüngrem özüng raksaba temenen agi asenok taküm, asenok chirnurtem, asen apuani, asen arogo, lokti aser yimten koda akoksatsü, ibaji Tsüngremi meteta lir. Iba jagi Laishibai ashir, temenenji özüng raksaba aser kodang asenok taküm aser kibong nung temeneni mulungba inyaksü tenzükdir, asenok asoshi Tsüngrem özüng mali ama akümtsü aser Laishiba menügdaktsü. Aji oda, asenokji özüng raksar taküm aser kibong akümer. Ibayongji asenok taküm aser kibong nung tepela samar aser shi aser tanüla nung tesama tulu ajurur. Aji oda, Tsüngremi mulungba nung jajatsübaji Tsüngrem peladaktsütsü kija atema masü saka asenok taküm aser kibong pelaa alitsü asoshi lir. Iba tangatetba nungji asenok alitsüla. Ajisüaka, asenoki asenok taküm aser kibongji kiyonger angatetba nung mesüra loktii angatetba nung alitsü merangra, ashiko asenokji Tsüngrem tsüngdangbo özüng raksartem asütsü. Tsüngremi Pa özüng nung jajadaktsünübaji Pai asenok asoshi renema yutsüba temoatsü aser tepela ajak agidaktsüner. Ajisüaka, özüng raksartembo pelaa malitsü aser parnokji temenen ta Laishibai ashir. Iba jagi tashi angar o mangar na, temenen o temeshi pur na, aser teti taküm alitsü purtem o malitsü purtem na bendanger.

OLEMSABANG

BAPTIST TELOKI BAPTISTPUR JENTOKBA OTSÜ

~ P.Renthy Jamir

Iba otsü ya kanga tongtimbang masü, saka nübur mulung atangtsü zülur. Alima tsüngküm mongpu melenshia kümtem süitema aodang putu ka nungi ka ta melenteper yamaji meimchir liyonga arudang kija kibong aser lokti tentet balala nung khen khen nisungi kodanga mamatsüsa tatalokba kar ajurur. Aser item taku tatalokbatemji putusa putu jena oaka mamateti nisungtemi metsüngareta jembia tamasür mulung tanga tansütsüsa alima tajungba küma melenshir.

Tatalokba otsüji ya küm 1921 Ao Baptist Arogo mungdang tezüluba report nung zülua aliba agi Baptist züngsem yim balala nung yamai liasü Mangmetong Arogo züngsem 417, Changtongya Arogo tanabuba züngsem 297, tasembuba Molungyimsen Arogo züngsem 208, pezübuba Mopungchuket Arogo Baptiba züngsem 194 liasü. Tanungba Ao Arogotemji kar noklang tema teimba noklang majung ano karbo Baptiba züngsem ter majung ano yim aika Arogo tenzüka mali ta liasü. Yamaji Changtongya yim Arogoji Ao lima nung Arogo tulutiba rongnung tanabuba sür Arogo terenlok tialong mapang mojingi Arogo telung nung mapa inyaksü tenzüka Arenlung agi kitsünglung küma teraksa tulu adok. Limapurtemi Arogo renlokbaji majinü arogopurtemji amokmerena amongtsü mong ajak mungangta mezüngmeshia beshi. Anungji Arogo nunger ajak yim tasen akümi aotsü jembi. Kodang limapurtemi aji angashi parnok kanga aoksa aser Arogo nunger dangji yim tasen akümi maotsü mepishia onoki nenok dang kecha mashitsü yim akümi tuo ta songtem. Joko Arogo nunger tsüngdaji telemsa adok kari ashi limapurtemi dang yamaji shira moli, kari ashi lemteterji kechi süli aotsübasa. Kibong 130 nungi taotsüpur 65 maotsüpur 65 ta lemdang ano Baptiba züngsem 297 nungi taotsüpur 144 maotsüpur 153 ta lemdang. Taotsüpurtemjagi government dang report tapu tapu süteper tesü Mokokchung SDO H.G Dennehy-i özüng yamai agütsü, Arogo nunger ajak yim tasen akümi oang limapur yimdak liang. Anungji lemdangba amaji kibong 65 Baptiba züngsem 144 ta 17th October 1921 nung Changtongya yimsen akümi ao.

British government temelaba tashi amshia yim tasen aküm nungji parnoki inti meyong senpong den Arogo tsükjen aser tenla ki ajak pena bener ao. Changtongya yimdak Arogo kibong 65 Baptiba züngsem 153 ta liaka tamanger kata mali ta SDO-i zülua toktsü. Sorkar aser yim tasenbapur o-ji dang angar kecha tsüngtong arua tatalokbaji sükzüka memenemdangi 1921 November Ao mungdang Mopungchuket nung sentepdang Changtongya Arogoji mungdang nungi jentok.

Aji oda arok meyong senpong bener ao tsükjen pena bener ao tenlaki pena bener ao aser mungdang nungi jentokbaji tamanger ka asoshi iba dang ya tuluba temerenshi kecha lima nunga atalokba Otsü mangashi. Alima kinük pezüsülen tamangba yimsü balala kati ka anemteper, saka Muslim limatem nunga khristantem yamaibo mekangshir, Communist limatem nunga iba tashibo meinyaker, Hindu RSS telokia yamai meinyaker. Alima nung Atheist Country ta ajaba (kecha yimsüa mamangba) lima Albania yangjia Khristan aika lir aser pernok nem yamala timtem agüja mejentoker.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

ABAM Music Ministry-i ayongzüka Kenten Benjung sentong ka agi



July 31, 2026 nikongdang Impur nung ABAM Music Ministry-i ayongzüka "Kenten Benjung" nung Arogo balala nungi shilem agirtem külemi tangokba noksa nung angur. Iba sentong ya "Ola jenti, Tenünsang ka" omen nung agi.

Mokokchung, Luroi/August 01 (TYO): ABAM Music Ministry ajanga ABAM otsü nung tang mezügbuba "Kenten Benjung" sentong ka Chiteni 31, 2026 aonung Impur nung "Ola jenti, Tenünsang ka" omen sür, Mrs. Asenla Longchar, Music Coordinator, ABAM lenisüba nung kanga temoatsü ngua agiogo, ta ABAM Executive Secretary, Rev. Tamsü Jamir-i sangdong ka ajanga metetdaksü.

Iba sentong ABAM Zone 1 asoshi agia liasü. Ajak agi Arogo ter ana (12) nungi choir züngsem 396 arua shilem tajung agi.

Iba Kenten Benjung nung shilem agiba Arogotemji-Alempang Baptist Arogo, Chakpa Baptist Arogo, Chuchuyimpang Baptist Arogo,

Impur Baptist Arogo, Longjang Baptist Arogo, Longjang Compound Baptist Arogo, Longkong Baptist Arogo, Longmisa Baptist Arogo, Longpa Baptist Arogo, Süngkomen Baptist Arogo, Tzüsapang Baptist Arogo aser Yisemyong Baptist Arogo liasü.

Mrs. Asenla Longchar ajanga iba sentong ya ABAM Music Ministry aliba agi agir ta masü saka Tenünsang Ken 150:6 nung "Tangula aliba kechisarena ajak agi Tsüngrem tenüng sangang" ta shia aliba ama Tsüngremi agütsüba sempet amshiba ajanga Pa tenüng asangba den külemi iba ya ajanga Pa osang tajung sangdonger, Arogo tashi itdaksür, kati ka ajungshiteper

aser tarutsü putu asoshi tajungshiba tulu ka asütsü ta nukjidong tejangja lemsatapa liasü.

Rev. Tamsü Jamir ajanga tayongzüka agütsüba mapang nung pai, "Choir mapa ya mapang intok mapa ka masü, saka nüburtem tanela nung ajungmesoa tekülem ayongzüka mapa ka lir. Anungji, ajaki tekülem nung kü shilem ajanga Tsüngrem tanela jungkai adokdaksütsü ta tangatetba nung bendanga agüja shilem agitsüla," ta ayongzüka.

Maneni iba sentong tarutsü nung agia aodang Tsüngremi asen ABAM Arogotem nung tenünsang ola tejanga adokba pa külemba nung tashi itta aotsü sarasadem.

ANO GO ABEN TSÜNGREM DEN

MULUNGSENTSÜ TEMERÜK

"Shir mulungsentsü merükmerüker parnok temoatsüba, kechiaser parnoki Tsüngrem angutsü."

~ (Mat. 5:8)

Tenük majunger tenük aina inok nungang tenük agi junga anguba ama Tsüngrem angutsü lenmang ka lir aser aji mulungsentsü temerük adenbapuri dang Tsüngremji angutsü akok ta Yisui jembia. Yisui yangi iba o jembiba ya kodanga mulungsentsü memerüki alirtem indang jembia masü saka temerük o memerük na mebendangi dang alibapur indang jembiba liasü. Itemji atishia leper temesüng mesüker, saka telunglen tasür teret aser teshimen menemba agi sünga lir ta atishia jembia. Ano mapang kar nung itemji anemsübapur ta-a atishia jembia. Item jagi kodanga Tsüngrem angutsü makok.

Asen tebilemba shisatsü (motive) tajung asütsüla. Aseni jembiba aser inyakbatemji tebilemba tajung nungdang inyakra aji mulungsentsü temerük mapa akümer. Iba mulungsentsüji nisungi mangutsü akok saka Tsüngrem tsüngdangbo asen tebilemba shisatsü sataka lir. Tsüngremi tajung inyakbaji aginür masü saka mulungsentsü tajung nung tajung inyakbaji dang aginür; nai tangar ka sema jembitsü akok, saka nai aji mulungsentsü tamajung dener asemer süra Tsüngremi aji magizüktsü. Saka nai kar o langzütepa tokteper ama saka aji mulungsentsü temerük agi tokteper süra Tsüngrem tsüngdangbo aji tagizüktetba akümer. Ne mapa Tsüngrem tsüngdang tagizüktettsü südaktsünüra temulungsentsü temerük agi inyakang.

SARASADEM:

Temeim Yisu ni inyakba, jembiba, aser asameyang ajak mulungsentsü temerük nungi inyaktsü merangdi. Amen.

Nepali Baptist Church Kohima küm 50 ajungba Jubilee amonger



July 31, 2026 nü Midland, Kohima nung Nepali Baptist Church Kohima (NBCK) Golden Jubilee nüngtem nung Rev. Dr. K. Santabir Rai-i Golden Jubilee nüngshilong sayatsüba sülen tangokba noksa nung angur.

Kohima, Luroi/August 01 (TYO): July 31, 2026 nü Midland, Kohima nung Nepali Baptist Church Kohima (NBCK) küm 50 ajungba Golden Jubilee mong among tenzüko.

"Aser Pa teyaritem tamadok" (Tenünsang Ken 103:2) omen nung ajemdaker iba Jubilee mong sentong tenzüka Association of Gorkha Baptist Churches Nagaland (AGBCN) Executive Secretary, Rev. Dr. K. Santabir Rai-i Goden Jubilee nüngshilong sayatsü, iba sülen Jubilee Procession agia Jubilee milen tsüklok.

Mezüngbuba sentongji Monolith Committee Convener aser Jubilee Organizing Committee nung Co-convener, Narayan Bahadur leniba nung agi.

Kasa sentong nung taoba mapang Nagaland nungi MP, Khyomo Lotha-i salem osang lemsatapa liasü.

Organizing committee Advisor Gagan Thapa-i sentong

tenzüka sarasadem, Nandu Kumar Thapa aser Rekha Thapa nati Lai azüng aser Golden Jubilee Joint Committee-i lokti pelaa agizükba ken ka aten.

Souvenir Committee convenor, John Thakuri-i Golden Jubilee nüngshi kakat adokba osang metetdaksüba sülen Pastor Jack Thapa-i kaketji sayaja liasü.

Organizing Committee convenor, Dr. Gopal Basnet Chetri-i tejaokertem metetpelaja liasü, iba sülen Jubilee Choir aser Nepali Baptist Church, Sechü Zubza nati ken aten.

Organizing committee convenor C.B. Gurung-i sentong tembanga sarasadem.

Jubilee mong sentong ya August 2 nü tembangtsü; sentong nung tongti o jembirtem rongnung Rev. Dr. Mar Pongener, General Secretary, Nagaland Baptist Church Council (NBCC); Rev. Rajendra Malla, President,

Nepal Baptist Church Council; Rev. Dr. Rachulie Vihienuo, Executive Director, Angami Baptist Church Council (ABCC); Visato Yhosu, Pastor, Union Baptist Church (UBC), Kohima aser Jack Thapa, Pastor, Nepali Baptist Church Kohima nunger densema lir.

Iba dak alia September 13 nü Jubilee atema tenünsang agütsüba sentong ka agitsü.

August 1 anepdang sentong nung Rev. Dr. Mar Pongener-i Tsüngrem O jembia aser nikongdang sentong nung Rev. Rajendra Malla-i Tsüngrem O jembia.

August 1 anepdang sentong nung Kohima Baptist Pastors' Fellowship Tir, Rev. Dr. Ruokuovilie Sachii-i salem osang lemsatapa aser nikongdang sentong nung AGBCN Church & Mission Secretary, Hari Magar-i salem osang lemsatapa liasü.

Tetsür kati khen danga methitemi ghonda 144 Laishiba azüng



Habibat Salawudeen Ihiovi-Jack

August 01, 2026: Nigeria tsür Khristan kati Guinness World Record yanglutsü nukjidong nung khen danga methitemi ghonda 144 Laishiba azüng.

Nigeria tsür Habibat Salawudeen Ihiovi-Jack ya Nigerian yimti, Port Harcourt nung aliba Summit Bible Church nung züngsem ka lir.

Lai June 22 anogo nung "144 Hours in the Word" tenzüka liasü aser anogo troknü tashi lai Laishiba azüng.

Arrshi küm 27, Habibat Salawudeen Ihiovi-Jack-i Guinness World Records indang temzüngtem shidak benshia liasü.

Lar Arogo nung pastor, Dr

Andy Osakwe-i, lai iba tayongzüka atemzüka inyakba ya Laishiba nung tera ayangtsü aser anogo shia Laishiba azüngtsü atema Khristantem ajungmesotsü nukjidong nung liasü, ta metetdaksü.

Tamalen United States nunga Mississippi nung pastor kati ghonda 96 khen danga methitemi sayutsüngiba ajanga Guinness World Record ka yangluteta liasü.

Jones County nung aliba First Baptist Church nung pastor, Matthew Olson-i taküm May 30 nungi tenzüka June 3 tashi nung khen danga methitemi Lipok nungi tenzüka Jungkai Adok tashi ghonda 96 sayutsüngiba liasü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züktep

(v) süng amshia raratep (fight with sticks)

* Election mapang telok ana züktep.

Zükyalema

(adv) ajak peria aser mulungsüa (fully satisfy)

* Arogo nungeri ajak zükyalema chiyongdaksü.

OLONG PAITEP # 7585

1		2			3		4		5
				6		7			
8									
						9			
			10						
11									12
					13			14	
15									
16							17		

TIPIEN

1. Nüji masü
3. Technütsüka
7. Aketa shirangba
8. Pi
9. Amena
10. Kinü
11. Tanang masü
13. Lenmang
15. Nübo tedi
16. Tuoshi
17. Shiruru apuba temenatsü

-(4)

-(6)

-(5)

-(6)

-(5)

-(5)

-(5)

-(6)

-(5)

-(6)

-(4)

LANGTSÜNGLEN

1. Jila tulu
2. Sarasademdang tembang
4. Tarutsü indang ashirtem
5. Alia
6. Mojing
9. Tai inyakba metet
10. Medemer chijiba
11. Tatokba / Amadok
12. Anüngdang masü
14. Jabaso masü

-(5)

-(4)

-(6)

-(5)

-(5)

-(5)

-(6)

-(5)

-(5)

-(4)

OLONG PAITEP # 7584 TELANGZÜBA**TIPIEN :**

2. Tatidang, 6. Angatet, 9. Aket,
11. Teimsür, 13. Rara,
14. Memeshi, 17. Mangdang.

LANGTSÜNGLEN :

1. Ente, 3. Tapet, 4. Ain, 5. Taküm,
7. Asür, 8. Tarak, 10. Teki,
12. Raksa, 15. Ents, 16. Hin.

NAI-A YA METETTER

Erode district administration-i 22 buba Erode Book Festival nung otsü tasan ka yangluogo aser ibaji Elite World Records nung zülüokogo.

July 31, 2026 nü School Education Department aser Makkal Sinthanai Peravai külemi yaritepa book-reading sentong ka ayongzüka agidang tesem 519 nung nisung 2,06,760 külemi kaket zünga liasü. Anepdang 9.30 ako nungi anepdang 9.52 ako tashi iba sentong nung kaketshirtem den külemi sorkar ketdangsürtemi shilem agia liasü aser iba ajanga "largest simultaneous book-reading event across multiple venues" otsü yangluogo.

Zomi Iennirtemi Manipur CM Khemchand den ajurutep

Imphal, August 1, 2026

(Agencies): Unified Zou Organisation (UZO), Zomi Chief Association (ZCA) aser Zomi Council (ZC) nungi teshimtet nübotemi July 31, 2026 nü Chief Minister Yumnam Khemchand Singh den ajurutepogo.

Imphal nung Chief Minister's Secretariat nung CM Khemchand den MLA Tongbram Robindro nati Zomi Iennirtem pelashishia agizük.

Sorkari yimjung ajungkettsü, kin ajak rongnung teputep adoktsü aser akhi ama liyonga aotsü tensa bener arutsü tenangzüka lir ta CM Khemchand-i parnok dang ashi.

Sorkari sendaktepa alir ajak den maneni olemteptsü aser tang tensa ajurua aliba süngjemtsüsa lemtet tajung ka agitsü ta paisa ashi.

Iba telok asem nungi teshimtet nübotemi Churachandpur nungi Imphal tashi külemi oa Chief Minister ajuruba ya tang mezüng lir. Iba ajanga law and order tensa tajungba akümba aser kin balala free movement sayur.

Zomi nunger Iennirtemi CM Khemchand dang state nung tebilemtsü khuret balala lemsatep aser sorkari yimjung bener arutsü aser tensa süngjemtsü asoshi inyakba nung nungita yaritsü nangzü.

Parnokisa Churachandpur nung Multi-Utility Hall ka yanglutsü tebilemba shidanga liasü.

Asür MLA Vungzagin Valte'er jabaso social worker Joseph Valte-i ashiba agi parnoki state nung yimjung aser azükaru arutsü imlar.

"Onoki Chief Minister den

district indang osang lemsateptsü atema Churachandpur nungi Imphal-i aru. Kin o kin tsünga temulung lemtep adokba nung yariteptsü atema onok aru" ta Zomi Council Chairman Vumsuan Naulak-ia ashi.

"Küm asem jungnüa lir külen onoki Imphal semdangtetogo. Temelenshi tajung aruba atema pelar aser iba ajanga tensa jüngjemtsü teimla sayur" ta Secretary (Information & Publicity), Zomi Council, Mary Jones-ia ashi.

Iba teshimtet telok nung Zomi Chief Association Vice President P. Guite, Unified Zou Organisation (Zomi Council) nungi Liankhankhup Zou aser Unified Zou Organisation, Zomi Chief Association o Zomi Council züngsemtem dena liasü.

Assam minister tem Sivasagar nung amungtsü: Hazarika

Guwahati, August 1, 2026

(Agencies): Assam nung tzümetsüng tensa süngjema kümdaker aser sorkari Sivasagar district nung kanga mejungi kongshiba tesemtem nung relief and rehabilitation maparen ulushiogo ta Agriculture Minister Pijush Hazarika-i ashi.

Deobar nungi tzümetsüng agi kongshiba kibongtem asoshi temporary housing maparen tenzüksü ta pai ashi.

Hazarika-i Nepali Khuti area semdangdang alima tzü-mopung ajanga teraksa bentsür aruogo

asere state sorkari timtemertem maneni yaria arudar ta Hazarika-i ashi.

Sivasagar nung hopta ana shi minister balala arua amunger aser parnoki relief operations aser rehabilitation measures ketdangsüa inyaker ta paisa shisem.

"Tsüngrem taochi ajanga tensa tajungba kümdar. Sorkari anüngdang aser aonung mebendangi asen nübotem yaridar. Minister asem mesüra pezü tashi Sivasagar nung tesüiba anogo 12 tashi mungzükdar.

Chief Minister Himanta Biswa Sarma-i tuyuba ama ni yashi aru aser tensa mesüngjem tashi amungtsü" ta Minister Hazarika-isa metetdaksü.

"Sivasagar district nung tzümetsüng agi kanga mejungi kongshiba tesemji Nepali Khuti area lir ta jangjaogo aser iba tesem nung ki aika tzü agi ponger ogo. Sorkari ki maliba kibongtem asoshi Deobar nungi temporary shelters yanglutsü aser taruba ita ana tsünga permanent houses renemtsü" ta paisa ashi.

MP Tagak-i Delhi & NCR North East Sports Meet 2026 tenzüksü

Itanagar, August 1, 2026

(Agencies): Arunachal Pradesh nungi Rajya Sabha MP Nabam Tagak-i mezüngbuba Delhi & NCR North East Sports Meet 2026 tenzüksüogo.

July 31, 2026 nü iba sentong nung Delhi Olympic Association President Saroj Sharma, CEO Kuldeep Vats, aser Delhi & NCR North East Sports Meet Chairman Manash Deka na aden.

Iba asayamung ya 7 Sisters

Foundation-i Delhi Olympic Association den yaritepa ayongzü. Delhi aser National Capital Region nung saisapongertem külemi anidentsü aser sportsmanship, unity & youth empowerment ajungkettsü nükjidong nung iba sentong ayonga agir.

"Sobaliba aser saisapong ya nübotem sendaktepba aser linük ka kümdaksüba tashi tulu ana lir. Asenoki tangatetba, maitsü aser tesem balala nungi nisung

temeyoktep akhümtsübütsüla aser kati ka angatetteptsüla, aria bilemtsüla aser adianu tangatetba alitsüla" ta MP Tagak-i ashi.

Iba sentong ajanga putepa alitsü aser külemi linük yangerts ajungmesor. Iba ajanga linük nung nisung balala tsünga tesentaktep akangshir ta paisa ashi.

Tagak-isa organising committee, volunteers, sponsors aser shilem agiba saisaponger ajak nem tenüngsang agütsü.

Russia-i Kyiv amak; nisung teku tepsetogo



yukjyu

Russia-i Kyiv amakba sülen gari ka ronger aliba anasa nüburtem adenshir aliba noksa nung angur.

Kyiv, Luroi August 1 (Agencies): Russia-i Ukraine yimtiba Kyiv ballistic missiles amshia amakba sülen nisung teku tepsetogo aser tanur pezü densema nisung 28 yirutsüogo, ta Kyiv Mayor Vitali Klitschko-i ashi.

Honibar anepdang Ukraine yimtiba ya amakba sülen yimti kübok tesem balala nung teraksatsüba adokogo, ta tenük kulu agütsürtemi Reuters dang ashi.

Kyiv kübok tesem balala nung mi adok aser tesem kar nungbo power makai aküm. Klitschko-i ashiba agi, Shevchenkivskyi district nung nisung aliba ki ka raksa aser ki telung nung nisung kar sabanga liasü. Iba ki mezüngbuba aser tanabuba floor tera chirepa liasü, ta pai ashi. Warehouse tema kar nung mi adoker lir, ta

paisa shisem.

Iba hopta tang agi tanabenbuba Kyiv ya makogo. Anogo ana tejakdang Ukraine amakba mapang Poland nung Russia indang cruise missile ka tsükba sülen anogo ana lir Honibarnü iba ya atalokogo. Brehostibarnü Kyiv amakba mapang nisung teku tepset, kong Kryvyi Rih anasa yimtsüng ka nung kibong ka nungi nisung trok densema liasü.

Russia-i, ita ishika tsüngda ballistic missile tem amshia Ukraine aiben maka arudar, aser kasa mapang nung Kyiv Patriot interceptor munitions agi anünga mapang ka lir, koba ajanga missile tem menokdangteti arudar. Iba atema telangzüba agüja Ukraine-ia Russia kübok tesem balala maka arudar. Parnoki

talisa totzü facility balala makdar.

Ukraine tir Volodymyr Zelenskyy-i parnok nem teyari agütsüba linüktem dang teyari talila agütsütsü asoshi asüngdanga arudar aser United States dang Patriot interceptor missile tem yanglutsü atema temelaba meshia arudar.

Hokolbarnü US tir Donald Trump-i ashiba agi, sensaksem tesüdak lir, saka Washington-i tang tashibo temelaba agüja mali aser kar nem iba missile yangludaktsütsü atema kanga kümdangtsüla.

"Kanga kümdangtsüla. Onoki tang tashi nungbo temelaba agüja mali. Onoki sensaksemdar, saka iba amala technology agüjatoktsüya temela masü, aser mataloktsü ta bilemer," ta Trump-i Hokolbarnü ashi.

Temerem tzüym nung taah agitsü Houthi telok sentong mali

Sanaa, Luroi/August 1 (Agencies): Yemen nung amendaker aliba Houthi teloki, Temerem tzüym nung parnoki azüoker aliba tzü lenmang adenba rongtem dang taah agitsü kecha sentong mali ta shiogo.

Iba osang ya Houthi kübok Humanitarian Operations Coordination Center (HOCC)-i Honibarnü metetdaksüogo, shirnoki Bab al-Mandeb Strait nung rong senzüsenpong achaayanger.

HOCC-i ashiba agi, iba tzü lenmang nung rongtem angati agi dang senzüdaktsür aser khari danga taah meshira parnokiji Yemen mesüra HOCC tenüng nung masü. Parnokisa, rong company tem dang temelaba magütsüi aliba telok nem taah magütsütsü mesüra osang melemsateptsü mepeshia metetdaksüogo.

Reuters news agency-i Bodhbarnü sangdong ka ajanga, Iran den sendaktepa aliba Houthi teloki iba strait süiba atema taah agitsü asadangdar ta ashiba sülen tang iba osang jangjashitsüogo. Parnoki Saudi Arabia nembo tenokdangba agütsür lir.

Bab al-Mandeb Strait ya

Temerem tzüym aser Gulf of Aden sendakteptsü atema tongtibang lenmang ka lir, koba Asia, Europe aser Middle East tsüngda totzü aser tanga khu belenshitsü atema amshir. Iba lenmang süiba atema taah agira, Iran-i tang Strait of Hormuz süiba atema taah agitsü atema inyaka aliba den kasa asütsü.

Yemen indang foreign minister Afrah al-Zouba-i Mongolbarnü ashiba agi, Houthi puri Iran mesüka inyaksangshitsü meranger.

Bab al-Mandeb süiba atema taah agiba ajanga Saudi Arabia tamajungba kongshitsü, shirnok Hormuz shibangba sülen iba tzü lenmang dak metaloker arudar.

Israel-i Gaza amak tenzüka sülen 2023 küm nungi Houthi teloki Temerem tzüym nung rong senzüsenpong nokdanga liasü aser taoba küm October ita ceasefire benokba sülenang anena liasü.

Tang asendenshir amokmerenba atema telangzüba agüja Saudi Arabia-i iba hopta Bab al-Mandeb Strait, Temerem tzüym aser Gulf of Aden nung kecha tetsükdaktsü makai senzüsenpongtsü atema linük 14 agi kümtetba maritime coalition ka sangdongogo.

Migrant tem Ceuta toktsür odar: Spain



Jose Manuel Albares

Ceuta, Luroi/August 1 (Agencies): Spain-i ashiba agi, migrant 60,000 shi North Africa nung Ceuta tesemi ali aser tzüym ajanga senoka aiterem parnok mulungka nung iba tesem toktsürogo.

Ceuta-i aitba mapang asürtem Honibarnü tashi nung 67 jungogo, ta Spain nunger ketdangsürtemi metetdaksüba den Morocco tsütsülena nisung karbo sür alitsü ta bilemer, ta ashi. Asürtem ya kar tzü nung arakseta asü aser kar arrtsü nung atsü sota aliba longnangi soketa atutsü merangba mapang süogo.

"Ceuta-i aiterem Morocco-i meyipaogo," ta Spain indang Minister of Foreign Affairs, Jose Manuel Albares-i Hokolbar aonung X nung zülutsü.

Ozüng alema nüburtem aika senoka aiba ajanga European Union sorkartem mesüngjemteti aküm, aser talisa Schengen

temeket nung alirtem shisabulua liasü. Schengen tesem nung linük 29-i parnok yongtsü nung senzüenpongtsü atema arrtsü shibanga mayutsü telemtetba agir lir.

European Union tekolak Ursula von der Leyen-i Hokolbarnü, Ceuta nung tatalokba ya agizüksü makok ta shiogo aser French Interior Minister Laurent Nunez-ia, France-i Spain den parnok arrtsü akangshitsü ta shia liasü.

Italy Ato Kilonser Giorgia Meloni-ia, arrtsü aser nüburtem kümzüka toktsütsü atema Spain den open-border Schengen agreement ya magi kümdaktsütsü amokmerena liasü.

Spain indang Interior Ministry-i ashiba agi, Brehostibar anepdang nungi tenzüka nisung 50,000 shi arrtsü adena liasü aser Hokolbarnü nikongtsütsü 6 ako tashi nung 48,300 meyipaogo. Ceuta indang local sorkar tekolakba Juan Jesus Vivas-i ashiba agi, taoba anogo ana tsüngda nisung 60,000 shi meyipa yokogo.

Spain Ato Kilonser Pedro Sanchez, shiba Hokolbarnü Ceuta-i oa liasü, pai ashiba agi, arrtsü adena nisungtem senoka aitba ya Spain indang territorial sovereignty anema lir.

Spain-isa, parnoki breakwater fence nung containment barrier ka amenoktsü ta sangdongogo.



GOVERNMENT OF NAGALAND

DIRECTORATE OF TECHNICAL EDUCATION

Nagaland : Kohima - 797 004



Tech Edu

NOTIFICATION

Dt. Kohima, the 1stAugust, '2026

NO.DTE/ESTT-2/NEET/01/2024-25/ This is to inform all NEET (UG)-2026 candidates who have submitted applications for admission to MBBS, BDS and Allied Courses for the Academic Session 2026-27 that the State NEET Merit List has been uploaded on the Department's website: www.dte.nagaland.gov.in and is also displayed on the Notice Board of the Directorate of Technical Education, Nagaland, Kohima.The Non-NEET UG Merit List for other medical and allied courses has also been uploaded on the Department's website and displayed on the Notice Board.

IMPORTANT INSTRUCTIONS

- Candidates are advised to carefully verify the particulars furnished in the merit list, including their Name, Father's Name, NEET Score, and ST Rank.
- In case of any discrepancy, candidates shall submit an application for correction/clarification to the office of the undersigned on or before 5th August, 2026 (Wednesday), during office hours. Requests may also be submitted through:
 - * E-mail:tenagaland@gmail.com
 - * WhatsApp: 9436001378 / 9612633719 / 8794486442
- No change or addition of course in preference shall be permitted.
- The minimum qualifying NEET (UG) score for Scheduled Tribe (ST) candidates is 177 marks.
- The Department has become aware of instances where candidates have submitted tampered or fabricated NEET scorecards. Such actions constitute a serious offence and may result in cancellation or debarment of candidature, along with appropriate legal action.
- Rejected Listcandidates may verify the remarks for reasons of rejection. Candidates may submitany pending or corrected documents, includingClass XII re-appeared mark sheets, certificates, or other relevant documentson or before 5th August, 2026.
- No request for correction, clarification or submission of documents shall be entertained after the stipulated last date, i.e., 5th August, 2026.
- The schedule for State NEET and Non-NEET Counselling shall be notified later through leading local newspapers and on the Department's website: www.dte.nagaland.gov.in.

(ER. VIPULHOU LHOUNGU)
Director.

CWG 2026: Preeti, Jaismine nati gold, Praveen-i silver aser Prabhu-i bronze medal nguogo



Preeti Pawar



Jaismine Lamboria



Praveen & Thirumaran



Soman Rana & Shubham Juyal

Luroi/August 1, 2026 (Agencies): Honibarnü Commonwealth Games 2026 tetsür 54kg boxing asaya nung Preeti Pawar-i Canada tsür Scarlett Savannah Delgado koka gold medal nguogo. Iba ya India asoshi taküm iba asayamung boxing asaya nung mezüngbuba gold medal liasü.

Bhiwani, Haryana nungi arishi küm 22 tain boxer, shibai taoba küm New Delhi nung World Cup asayaba mapang gold medal ka ngua liasü, lai Honibarnü final asaya ya 5-0 agi kokogo.

Preeti-i final asaya kanga junga tenzüik aser mezüngbuba round ya 10-8 agi akok.

Bantamweight division nung World No. 3 asayar yagi tanabuba round-a kanga junga tenzüik aser tatem tashi kanga junga asaya-a takok angu.

India tsür la yagisa, Hokobarnü Zambia tsür Catherine Mwape den semifinal asaya-a 5-0 agi koker liasü.

India nunger boxer tem rongnung Mohammed Ali Qamar ya Commonwealth Games nung gold medal anguba mezüngbuba asayar lir. Qamar-i 2002 küm Manchester nung Commonwealth Games asayaba mapang Light Flyweight category nung gold medal ngua liasü.

Iba sülen 2006 Commonwealth Games nung Akhil Kumar-ia gold medal angu aser 2010 Commonwealth Games nung Suranjoy Mayengbam, Manoj Kumar aser Paramjeet Samota nungeri gold medal angu.

2014 Commonwealth Games nungbo India nunger boxer temi gold medal ka danga mongutet, saka 2018 aser 2022 küm gold

medal asemsem ngua liasü.

MC Mary Kom, Nitu Ghanghas aser Nikhat Zareen nunger sülen Preeti ya Commonwealth Games nung gold medal anguba tetsür asayar pezübula kümogo.

Honibarnüsa arishi küm 24 tain Jaismine Lamboria-i Northern Ireland tsür Michaela Walsh 5-0 agi koka boxing asaya nung India atema tanabuba gold medal ngutsüogo.

Bhiwani, Haryana nungi asayar ya Indian Army ka lir aser lai 2022 Commonwealth Games nung lightweight category nung bronze medal ngur liasü, ajisüaka lai takümbo gold medal ngutetogo.

Jaismine-i mezüngbuba round ya kanga toktepa asayaba sülen split verdict agi takok ngua liasü. Ajisüaka Jaismine-i tanabuba round ya unanimous verdict agi

akok.

Jaismine Lamboria-i tetsür 57kg boxing asaya nung gold medal anguba sülen India-i taküm Commonwealth Games nung gold medal tenetbuba kokogo.

Taküm iba asayamung nung Saikhom Mirabai Chanu-i mezüngbuba gold medal ngua liasü. July 26 nü lai tetsür 48kg weightlifting asaya nung iba medal angu.

Iba sülen Sharmila Dhankar aser Dilip Gavit nati tetsür shot put F57 aser tebur 100m T47 nung gold medal nguogo. Maneni Asmita Dey aser Harsh Singh natia Hokobarnü judo asaya nung gold medal nguogo.

Kasa asayamung tebur triple jump asaya nung Praveen Chithravel aser Selva Prabhu nati silver aser bronze medal nguogo.

Asian Games bronze medallist Chithravel-i, 16.58m jukteta Glasgow nungbo silver medal ngutetogo.

Kasa mapang nung küm India nunger asayar Selva Prabhu-ia 16.52m jukteta bronze medal angu, koba pa asoshi international tetoktepa ka nung mezüngbuba medal anguba liasü.

Iba asaya ya Jamaica nunger asayar Jordan Scott-i koka gold medal nguogo. Pai 16.72m jukteta liasü.

Taküm CWG nung India nunger para-athlete temi kanga junga asaya arudar aser Honibarnü maneni tebur Shot Put F57 category nung Soman Rana aser Shubham Juyal nati gold aser silver medal nguogo.

Sonam-i 13.40m merepteta gold medal angu aser Shubham-i 13.28m merepteta liasü.

Changtongya Kaketshir Telungjem-i 3 Buba U-20 Futsal Tournament asaya



Luroi/August 1, 2026 (Dimapur): Changtongya Kaketshir Telungjem ajanga 3 Buba U-20 Futsal Tournament ayongzuka Changtongya Town local ground nung 31st July - 1st Aug 2026 anogotem nung kanga junga takok ma nung tembanga liasu.

Iba tournament nung Dr. Aomeren, Medical officer ajanga iba asayamung lapooktsu. Pai asayartem ajungshia pei dak aketba spent tajungtiba agi shilem tajung agiba den kulemi PEI takum asungteta tila akumba

asayar kaka asutsu ayongzük. Sendong shibangtsur Er. Chenithung Ngullie E E PWD (R&B) Changtongya-i sports ajanga lanurtem jenjang tajung yanglua Pei takum ajangzüksu asoshi shia liasu.

Iba asayamung nung team ajak agi 10 liasu.

Iba asaalamung nung G. A. S F C-i mezungbuba jenjang angu aser soyim boys-i tanabuba jenjang nguteta liasu.

Tournament nung takok angur tem nem senpet Sen 40000 den kulizung kakat aser tanabuba

angurtem nem senpet Sen 20000 den kulizung kakat aguja liasu.

Jurila senpet item asayartemi akizuka liasu:

- 1) Highest scorer - Mr. Moamanen (outcast f.c)
 - 2) Most promising player - Mr. Jongpongreba (young vision f.c)
 - 3) Best player - Mr. Chubalemba (soyim boys)
 - 4) Best Goalkeeper - Mr. Hongkum (G.A.S F C)
- Nunger tem nem agutsua liasu.

Jamshedpur FC ISL nung masayatsü

Luroi/August 1, 2026 (Agencies): Jamshedpur FC-i parnok Indian Super League (ISL) nung shilem magitsü atema telemtetba agiba Hokobarnü metetdaksüogo. Taruba season atema shilem agiba taah agütsüsü asoshi atakzüksüba mapang tembangba sülen ghonda ishika lir parnoki iba osang sangdonga liasü. ISL ya September 4 nü tenzüksü.

Iba ita tetenzüklen All India Football Federation (AIFF)-i July 20 nü tashi nung asayamung nung shilem agiba taah 1.1 crore agütsüsü atema atakzüksü, ajisüaka mapang ya Hokobarnü nikongtsüsü tashi atsülangja liasü. Sen 1.1 crore ya shilem ana kuma lemsar agütsütetsü.

Club-i ashiba agi, parnok 2026-27 season nungi tenzüka ISL nung shilem magitsü.

Source balala ajanga ashiba agi, club indang board of director temi tang atemabo first team ya loksatsü asoshi telemtetba agiogo.

Varanasi nungi Inter Kashi club shirnoki July 20 tashi nung taah magütsü liasü parnokia taah agüjatokogo.

Iba tetezü tanungba club 13-i asayamung nung shilem agütsüba taah agüjatokogo.

"Inter Kashi-i taah agütsüogo aser onoki club 13 dang asayadaksüsü asü masü

iba dak sendakba nung Honibarnü telemtetba ka agitsü," ta AIFF ketdangsür kati PTI dang ashi.

Jamshedpur FC koba 2017 küm tenteta liasü iba club yagi sangdong ka ajanga ashiba agi, parnok grassroots level nung asaya ajungkettsü atema rangloker inyaksü.

"Jamshedpur Football Club 2026-27 season nungi ISL nung shilem magitsü ta jangjashitsüner," ta club-i X ajanga metetdaksü.

"JFSPL pur India nung football asaya maneni renloka odaktsüsü atema tanga inyakyim asoshi maneni bendanga agütsür lir. Grassroots level nung asaya ajungkettsüba densema football asaya ajungkettsü asoshi onoki maneni inyaksü.

"Onoki maneni India kübok tesem balala nungi lanur asayartem bushiteta parnok terenlok asoshi inyaksü," ta club-isa metetdaksü.

July 8 nü AIFF aser ISL club tem tsüngda club nem Indian Super League küm ana atema achaayangdaksüsü atema telemtetba ka agia liasü.

AIFF-i ISL indang commercial rights ya club tem nem küm pezü atema agütsüogo. Ajisüaka küm ana sülen iba tenangzüktepa nungi atsüngintsü atema club tem nem lenmang lapoka toktsüogo.

BILEMDANGANG

"Akümli tatsüka alidang tatem makaba lima asoshi renemtsüla."